



1999

26. Al Onorevul **Michêl Martina**
«Premi San Roc» pal 1999

Fiesta granda e sun di cjampanis uê a San Roc ma, cun vêr displasè, jo no soi a la consegna dal premi a Lui distinât. Doi apuntaments di alt nivel mi àn clamât a Roma ma, se ancja lontana, o soi presint istès cul me spirt, tant plui, ch'a son prontis culi indevant dôs pineladis su la Sô figura di om impegnât sul front politic, civil e uman.

Felicjitzions di cûr cu l'auguri di gjoldi in ligria e serenitât chist biel moment da Sô vita.

A erin ains difizzii, intosseâts di nazionalisin
chei subit dopo la uera.

Ains di odio madressût in sen a li' etniis
cun lidrîs strafondis duris di stirpâ.

Velen sbrocât in tun confin balort
fat di fil spinât ch'al taiava in doi
la zitât benedeta sul Lusinz.

A Berlin fin aiar al mûr da svergonza,
culi a Guriza, 'na ria di palets a savoltâ
cussienzis e a crevâ leamps di sanc
incrosât par amôr. Nò, no jera pussibil
cambiâ musa dal vuê al doman
e cjalâsi di sbiego come cjans e gjats.

Tra i oms di frontiera plui moderâts
e sensibii, cun intuizions metudis a frut,
ancja Lui, gurizan patòc di chel borc
a doi pas dal confin viars Salcan.

Al era vignût fûr di un ambient insiorât
di nobii sintiments e di operositât ferbinta.
Cul timp, incarghis di impegn e responsabilitât
simpri plui penzis fin a rivâ in Parlament
come deputât, senatôr e ancja sindic stimât e
benemerit di Guriza, cun di plui,
platât tal cûr, un sium covat a lunc:
chel di splanâ stradis e butâ sul confin
marcât di ideologjis diviarsis, un puint

di pâs e di riconcjiliazion. E' na di
finalmentri, al prin incontri cun chei dilà da rêr.
Nova Goriza, Lubiana, Klamfurt e Venlo, tapis
luminosis par trois di amicitia e colaborazion.

A Guriza, incontris europeans di cultura
cun poetis, scritôrs, politics, sienziâts
e studiôs di ogni sorta, ducj insieme atôr
di 'na taula par dismovi cussienzis, par promovi
programs e butâ li' fondis par una Europa
unida.

Om di pocjis peraulis, dal fâ signorîl, ùmil
'navora riservât e atîf, lu ai' na di incontrât
cu la sô sposa, ai pîs di una grota, palc di teatri
naturâl, su li' stradis di Cappadocja a Göreme
indulâ ch'a je passada la Callas a cjantâ

«Medea».

Tiara di vulcans, di glesiutis sculpidis intal cret
ch'a nus à lassât ricuarts maraveôs romai
lontans

ma, soradut, un'amicitia scleta che no segna 'l
pas.

Cumò intal so fogolâr plen di calôr, un impegn
gnôf

ch'al lu ten ocupât a contâ storiis e contis di
gust,

al prin butul sflurît ca di Sô fia ch'al lu fâs tornâ
zovin

Vuê, al è rivât ancja chist premi ch'al parta
gjonda e sodisfazion a Lui e a chei di cjasa.
Beâts i operadôrs di pâs come Lui, ancjamò
su la cresta. Di lôr nus restarâ memoria senza fin.

Guriza, ai 28 di novembar dal 1999

Anna Bombig